

# Sportissimo

DA RAV. MARGUERITE  
SCHMID-ALTWEGG, VEULDEN

«Cun nus fagiats vus era part – 24 uras dal di», uschia ha il radio empermess a nus 24 uras da reportaschas; 24 uras da discussiuns; 24 uras dad analisas «pertge e pertge betg»; 24 uras da giubilaziuns e da trumpadas; 24 uras da gratulaziuns e – da taschair! Gea, nagin pleda da tschels che na vegnan betg maisters. Naginas fotografias, nagins interviews, naginas remartgas.

Els fagevan *propi* part da l'olimpiada – mo i para sco sch'els n'existes-san betg.

«Gieus olimpics» sa numna quest circus. Mo jau ma dumand: Tgi gioga a Nagano – quels che vegnan maisters ni tschels che perdan? Ni, na datti in-summa nagins gieus, mo pli cumbat e – sa murtirar?

Jau sai che mes patratgs èn cuntraris a l'opiniun publica. Jau sai ch'il sport è la chausa dasperas la pli bella dal mund.

Mo jau sai era che gist il sport è degenerà d'in gieu cun concorrenzas ad ina concorrenza senza spazi per gieus. Sulettamain la victorgia vegn pagada. Mo la victorgia quinta. Tut vegn trenà – sulettamain la terrada betg!

Mo forsa è il sport dad oz in spievel da nossa vita, oravant tut da nossa vita da clamada. I na basta betg pli d'avair emprendi in mastregn – ti stos esser l'emprim ed il miglier per chat-tar ina lavur, e ti stos esser en il me-

dem mument movibels e stinà per pudair tegnair tia piazza.

Forsa è il sport dad oz in spievel da nossa politica. Ils rehns ed ils gronds da las buccas largias han da dir e da decider bler dapli ch'ils impiegads ed ils lavurers. Nagin discorra dals pitschens – els perdan sulettamain lur piazzas da lavur. Els daventan statistica.

Forsa è il sport dad oz perfin in spievel da nossa mentalità. Nus ammirain stars ed idols per betg emblidar noss'atgna mediocritad. Nus na vulain betg acceptar che il bliers da nus èn pitschens, senza titel e senza num – mo sco umans tuttafatg normals!

Insatgi a ditg: «Dieu ama il pitschen, perquai a El fatg tants da quels.» E l'apostel Paulus a scrit: «Na savais vus betg che vus essas il tempel da Dieu, e ch'il Spiert da Dieu avda en vus?» Quai n'è betg in confiart per ils pitschens, mo in envid a tuts da guardar dapli sin l'atgna persuna e l'atgna personalità. Jau sun jau – e sco tala sun jau amada da Dieu, ed jau sun degna dad esser il tempel dal Spiert da Dieu. Jau na stoss betg curer pli spert (citius), ni saglir pli aut (altius), ni esser pli ferm (fortius) ch'ils auters per vegnir acceptada da Dieu. I basta dad esser quel uman che Dieu a stgaffi e ch'el ama sco tal, cun tut las qualitads, mo era cun las atgnadads e las flailvadads che mintgin da nus ha.

Ch'ils gieus olimpics daventian *propi* gieus da la legria e da la vita – era per *tschels* che perdan!